



Bizkaiko ahal-dun nagusiak atzo adierazi zenez, Herri Dirubideen Euskal Kontseiluan adostutako Ekarpén Lege berriak ez du «aldaketa sakonik» ekarriko. Ostegunean Unai Re-

menteriak oraindik indarrean dagoen legea goraipatu zuela gogoratu beharra dago, bere ustez, «lege ona» izan delako. Arabako eta Gipuzkoako ordezkarien iritzia bestelakoa da.

# Rementeriak ez du «aldaketa sakonik» ikusi Ekarpén Legean

GARA | BILBO

Unai Rementeria Bizkaiko ahal-dun nagusiak atzo aitortu zenez, Ekarpén Lege berriak ez du «aldaketa sakonik» eragingo. Hala adierazi zuen Bizkaiko Batzar Nagusietako taldeen aurre-

an atzo egindako agerraldian. Iraskunde, Gobernamentu On eta Gardentasunerako Batzordean goraipatu zuen ostegunean Herri Dirubideen Euskal Kontseiluan lortutako akordioa, izan ere, haren iritziz, «denok eman eta irabazten dugu».

Berrikuntzarik aipagarriena koefiziente bertikalaren balio berria da, %70,04tik %70,81era igo baita. Koefiziente horizontalari dagokionez, hiru aldundiekin egokitzen joan da egun indarrean den legeko metodologia bera mantentzea; lurralde bakoitzeko barne produktu gordinaren eta zerga ahaleginaren arteko lotura oinarritutako metodologia da. Toki-erakundeek zerga itunduetan izango duten gutxiengo partaidetza ehuneko, berriz, %39,23koa izango da.

Bizkaiko Batzar Nagusietako oposizioko taldeek lortutako akordioa kritikatu zuten. EH Bilduko batzarkide Arantza Urkaregiren esanetan, udalek ez dute

parte hartu negoziazioan, eta, adierazi zenez, Eudelen ere ez da erabateko adostasunik. Urkaregik baliabide gehiago eskatu zituen udalerrietan.

Ildo horretan, lege berriarekin krisi garaietan udalerriek diru gutxiago jasoko dutela ohartarazi zuen Elkarrekin Bizkaia. Halaber, gardentasun falta kritikatu zuen. Israel Escalante batzarkideak halako prozesuetan herritarrek parte hartzea defendatu zuen. PPko batzordekide Amaya Fernandezek ere akordioaren aurka egin zuen. Haren ustez, osteguneko bileran lortutako akordioak «agerian uzten du Aldundia ez dela gai bizkaitarren interesak babesteko».



Unai Rementeria Bizkaiko Batzar Nagusietan izen zen atzo.

BATZAR NAGUSIAK